



BAB 1 PENDAHULUAN



PENDAHULUAN

1.1 Pengenalan kepada Kajian Pengesanan Graduan KPT

Kaji selidik secara atas talian yang dibangunkan oleh Kementerian Pendidikan Tinggi (KPT) ini bermula pada tahun 2006. Tujuan utama kaji selidik ini dijalankan adalah bagi melihat status pekerjaan graduan baru menjelang musim konvokesyen masing-masing, iaitu sama ada bekerja, melanjutkan pengajian atau masih aktif mencari pekerjaan. Tumpuan kajian adalah kepada graduan peringkat diploma dan ke atas. Walaupun begitu, semua graduan peringkat sijil UA, politeknik dan kolej komuniti turut menyertai kajian ini. Di samping itu, terdapat juga graduan peringkat sijil IPTS yang turut menyertai kajian.

Maklumat asas graduan iaitu latar belakang pengajian adalah dibekalkan oleh IPT masing-masing dan maklumat tersebut tidak boleh diubah oleh graduan.

1.2 Metodologi Kajian

Soal selidik kajian ini dipaparkan dalam laman web dan boleh dicapai melalui 'graduan.mohe.gov.my'. Tempoh pelaksanaan kajian ini ditetapkan mengikut tarikh konvokesyen setiap IPT. Lazimnya, selepas data asas yang dibekalkan oleh IPT berkaitan dimuat naik, sistem kajian akan dibuka dua ke tiga minggu sebelum tarikh konvokesyen dan akan ditutup seminggu selepas tarikh tamat konvokesyen. Walaupun demikian, pihak IPT boleh membuat perubahan tarikh buka dan tutup sistem kajian ini mengikut kesesuaian masing-masing. Setiap IPT bertanggungjawab memaklumkan kepada graduan mereka untuk memberi respons kepada kajian ini. Data yang lengkap akan diberi kepada IPT terbabit setelah sistem ditutup untuk tujuan analisis oleh IPT.

1.3 Struktur Soal Selidik Kajian Pengesanan Graduan 2015

Bagi soal selidik tahun 2015, sedikit perubahan pada struktur soal selidik telah dibuat, iaitu bahagian status dan maklumat pekerjaan serta belum bekerja diletak di bahagian hadapan. **Bahagian A** mengandungi maklumat latar belakang asas dan akademik para graduan yang dibekalkan oleh IPT masing-masing.

Bahagian B merupakan soalan berkaitan status pekerjaan terkini, sama ada bekerja sepenuh masa atau bekerja separa masa, tidak bekerja atau lain-lain. Manakala **bahagian C** adalah soalan berkaitan maklumat pekerjaan graduan seperti taraf pekerjaan, kumpulan pekerjaan utama, sektor pekerjaan, pendapatan bulanan graduan dan sebagainya.

Bagi graduan yang belum bekerja, mereka perlu menjawab soalan berkaitan di **Bahagian D**. **Bahagian E** dikhususkan untuk graduan yang melanjutkan pengajian semasa musim konvokesyen masing-masing.

Penilaian graduan terhadap IPT masing-masing berkaitan kandungan kurikulum, sistem penilaian, tenaga pengajar dan kemudahan prasarana serta perkhidmatan bimbingan dan kaunseling yang disediakan di IPT masing-masing terdapat di **Bahagian F**. Manakala persepsi graduan mengenai keberkesanan sistem pengajian dan kesediaan diri bagi menghadapi cabaran dunia pekerjaan terkandung dalam **Bahagian G**.

1.4 Penyertaan IPT dalam Kajian Pengesanan Graduan KPT 2015

Sebanyak 387 buah IPT telah menyertai Kajian Pengesanan Graduan KPT pada tahun 2015 berbanding 357 IPT pada tahun 2014. Kesemua UA, politeknik dan kolej komuniti yang mengeluarkan graduan pada 2015 telah menyertai kajian ini, iaitu 20 buah UA, 29 politeknik dan 79 kolej komuniti. Bagi IPTS pula, sebanyak 249 buah telah menyertai kajian pada tahun 2015 berbanding 232 buah pada tahun 2014. Di samping itu, terdapat sebanyak 10 buah IPT lain turut menyertai kajian ini pada tahun 2015.

Senarai IPT yang mengambil bahagian dalam kaji selidik 2015 diterakan pada **Lampiran 1**.

1.5 Susunan Buku Laporan 2015

Fomat laporan 2015 ini diteruskan seperti tahun-tahun sebelumnya, iaitu dalam bentuk grafik dan jadual lengkap. Laporan Kajian Pengesanan Graduan ini terdiri dari tujuh bab keseluruhannya, iaitu **Bab 1** adalah pendahuluan yang merangkumi struktur soal selidik, penyertaan IPT dalam kajian ini dan profil graduan. **Bab 2** memaparkan corak keluaran graduan mengikut IPT, peringkat pengajian, kewarganegaraan dan jantina bagi UA, IPTS, politeknik, kolej komuniti dan IPT lain.

Bab 3 memberi fokus kepada status pekerjaan graduan mengikut peringkat pengajian secara lebih terperinci. Manakala **Bab 4** adalah maklumat pekerjaan seperti taraf pekerjaan, kumpulan dan sektor pekerjaan, pendapatan bulanan serta sektor ekonomi bagi graduan 2015 yang bekerja.

Maklumat graduan 2015 yang melanjutkan pengajian sejurus tamat pengajian dipaparkan dalam **Bab 5**. Manakala **Bab 6** mengandungi maklumat graduan yang belum bekerja, iaitu sebab belum bekerja, kadar belum bekerja mengikut bidang pengajian, peringkat pengajian dan sebagainya.

Bab 7 mengandungi laporan berkaitan keluaran dan maklumat pekerjaan graduan (warganegara) bagi kumpulan berfokus, iaitu graduan yang bekerja sendiri, graduan Orang Kurang Upaya (OKU) dan graduan berketurunan Orang Asli.

Pada bahagian awal laporan ini turut disisipkan laporan berbentuk infografik trend keluaran dan status pekerjaan dalam tempoh lima tahun kebelakangan ini, iaitu dari tahun 2011 hingga 2015 agar para pembaca mendapat perspektif yang lebih jelas tentang kebolehdapatan kerja para graduan sempena musim konvokesyen masing-masing.

1.6 Kadar Respons Kaji Selidik 2015

Seramai 238,385 responden daripada 273,373 graduan 2015 telah menyertai kaji selidik pada tahun 2015 dengan memberi kadar respons sebanyak 87.20 peratus. Mengikut kategori IPT, kadar respons tertinggi dicatat oleh graduan kolej komuniti, iaitu sebanyak 95.74 peratus, diikuti UA (93.93 peratus), IPT lain sebanyak 90.67 peratus, politeknik (88.42 peratus), dan IPTS sebanyak 79.17 peratus. Kadar respons bagi setiap IPT adalah seperti dalam **Lampiran 1**.